

RELACION  
PËR  
PROJEKTLIGJIN

**“PËR DISA SHITESA DHE NDRYSHIME NË LIGJIN NR. 10465, DATË  
29.09.2011 “PËR SHËRBIMIN VETERINAR NË REPUBLIKËN E  
SHQIPËRISË”, I NDRYSHUAR**

**I. QËLLIMI I PROJEKTAKTIT DHE OBJEKTIVAT QË  
SYNOHEN TË ARRIHEN**

Qëllimi i këtij projektligji është që nëpërmjet ndryshimeve në ligjin nr. 10465, datë 29.9.2011 “Për shërbimin veterinar në Republikën e Shqipërisë”, i ndryshuar të bëhet e mundur:

1. zbatimi i reformës së shërbimit veterinar dhe plotësimi i kuadrit ligjor për unifikimin e shërbimit veterinar duke mundësuar kalimin e kompetencave dhe funksioneve të shërbimit veterinar të pushtetit lokal në strukturën e shërbimit veterinar në MBZHR pasi me miratimin e ligjit nr. 139/2015 “Për vetëqeverisjen vendore”, njësitë e qeverisjes vendore nuk i kanë më këto struktura.

2. Plotësimi i kuadrit ligjor për të mbështetur punën e shërbimit veterinar gjatë zbatimit të detyrave të përditshme dhe ngritjen e standardeve me lidhje me shëndetin dhe mirqënien e kafshëve, funksionet e veterinerit zyrtar, regjistrimin dhe përdorimin e Produkteve Mjekësore Veterinare vakume ligjore të ndryshme të pa pasqyruara në ligjin nr. 10465, datë 29.9.2011 “Për shërbimin veterinar në Republikën e Shqipërisë”, i ndryshuar. . Gjithashtu gjatë zbatimit të detyrave të përditshme, shërbimi veterinar ka hasur

**II. VLERËSIMI I PROJEKTAKTIT NË RAPORT ME PROGRAMIN  
POLITIK TË KËSHILLIT TË MINISTRAVE, ME PROGRAMIN  
ANALITIK TË AKTEVE DHE DOKUMENTE TË TJERA  
POLITIKE**

Ky projektakt del si nevojë në plotësimin e kuadrit ligjor në lidhje me kalimin e kompetencave dhe funksioneve të shërbimit veterinar të pushtetit lokal në strukturën e shërbimit veterinar në MBZHR dhe vakume ligjore të ndryshme duke synuar përmirësime në kuadrin ligjor në mbështetje të punës së shërbimit veterinar në arritjen e objektivave dhe standarteve të BE-së të përcaktuara në politikat dhe strategjitë e Qeverisë në tërësi dhe MBZHR në veçanti.

Ky projektligj është parashikuar në Programin Analitik të Akteve që do të paraqiten për shqyrtim dhe miratim në Këshillin e Ministrave në vitin 2018.

### **III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME**

Nëpërmjet ndryshimeve që sjell ky projektligj do të mundësohet që:

- Të unifikohet shërbimi veterinar i cili aktualisht është i fragmentuar në dy struktura përkatësisht nëshërbimin veterinar në strukturat e MBZHR dhe në strukturat veterinare në njësitë e qeverisjes vendore.
- Fusha e veprimtarisë së veterinerit zyrtar do të përfshijë edhe kontrollin shëndetësor të kafshës para dhe pas therjes, tregjet e kafshëve të gjalla, kullota dhe njësitë e shitjes së kafshëve të shoqërimit dhe zbukurimit.
- Të përmirësohet procedura e regjistrimit dhe përdorimit në Republikën e Shqipërisë të Produkteve Mjekësore Veterinare .
- Të zbatohen masat për biosigurinë në ferma me qëllim reduktimin e rrezikut të hyrjes, zhvillimit ose përhapjes të sëmundjeve tek kafshët në fermë dhe/ose objekt, zonat ose çdo ambienti tjetër dhe mjetet e transportit”.

### **IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR**

Ky projektligj është hartuar në mbështetje të neneve 78, 83 pika 1, të Kushtetutës.

### **V. VLERËSIMI I SHKALLËS SË PËRAFRIMIT ME *ACQUIS COMMUNAUTAIRE* (PËR PROJEKTAKET NORMATIVE)**

Ky projektligj nuk ka përafrim me legjislacionin e BE-së.

### **VI. PËRMBLEDHJE SHPJEGUESE E PËRMBAJTJES SË PROJEKTAKTIT**

Në këtë projektligj ka 34 nene të cilat kanë përmbajtje si më poshtë:

- Në nenin 1 propozohen ndryshime në nenin 1 “Qëllimi” të ligjit 10465 datë 29.9.2011 “Për shërbimin veterinar në Republikën e Shqipërisë”, i ndryshuar pasi në qëllimet e këtij ligji nuk kanë qënë të përfshira përcaktimi i rregullave për parandalimin dhe kontrollin e sëmundjeve të transmetueshme tek kafshët ose njerëzit nëpërmjet klasifikimit të tyre

- sipas prioriteteve, miratimin dhe regjistrimin e objekteve dhe mjeteve transportuese, garantimin e lëvizjes dhe gjurmueshmërisë për hyrje daljen e kafshëve, produkteve embrionale dhe produkteve me origjinë shtazore, jo për konsum human në Shqipëri dhe vendosjen e masave urgjente që duhen marrë në rast të shpërthimit të një sëmundjeje. Në këtë mënyrë plotësohet i gjithë qëllimi që ka ky ligj.
- Në nenin 2 propozohen ndryshime në nenin 6 të ligjit "Objekti" duke shtuar në objektin e ligjit edhe kafshët me pronar ose jo, kafshët e egra, produktet embrionale, produktet me origjinë shtazore jo për konsum human, subjektet, mjetet e transportit, pajisjet si dhe, si dhe çdo material i cili ndikon ose është i prirur të ndikojë në përhapjen e sëmundjeve të transmetueshme të kafshëve. Ato trajtohen në ligj por nuk ishin përcaktuar në objektin e tij. Në këtë mënyrë, me ndryshimet e propozuara në nenin 2 të projektligjit plotësohet i gjithë objekti i ligjit egzistues..
  - Në nenin 3 propozohen ndryshime në nenin 4 të ligjit "Përkufizimet" pasi megjithëse janë të përmëndura në ligj ose në ndryshimet e propozuara mungonin definicionet për termat "Biosiguri", "Hetim epidemiologjik", "Sistemi i informacionit të epidemiologjisë veterinarë", "Stabiliment", "Survejance". këto ndryshime plotësojnë përkufizimet edhe për termat e sipërcituara.
  - Në nenin 4 propozohen ndryshime në nenin 6 të ligjit "Identifikimi i kafshëve të prodhimit", është bërë pasi tek kafshët e prodhimit që i nënshtrohen identifikimit të detyrueshëm nuk ishin përfshirë kafshët njëthundrake (kuajt, mushkat gomerët). Identifikimi i këtyre kafshëve është shumë i rëndësishëm pasi njëthundrakët preken nga disa sëmundje zoonotike (që trasmetohen edhe tek njeriu), si dhe sëmundje të tjera infektive të tyre. Identifikimi i tyre do të ndihmojë që në rastet e shfaqjes së një sëmundjeje të njëthundrakëve të mund të gjurmohet ferma e origjinës si dhe fermat ku mund të ketë lëvizur kjo kafshë. Në këtë mënyrë mund të parandalohen, zbulohen dhe kontrollohen sëmundjet infektive të njëthundrakëve. Në kushtet e mbarshimit në ferma të vogla ato mund të bëhen burim i përhapjes së sëmundjes nga një fermë në tjetrën edhe sëmundjeve që prekin lloje të tjera të kafshëve. gjithashtu identifikimi i kafshëve njëthundrake mundëson hatrimin e programeve të monitorimit të sëmundjeve të tyre. Aktualisht është e miratuar rregullorja për identifikimin e kafshëve njëthundrake, e cila ka përafuar rregulloren përkatëse të BE-së. Identifikimi dhe monitorimi i sëmundjeve infektive të njëthundrakëve janë dy pikat kyç për të filluar plotësimin e kritereve për eksportin e njëthundrakëve në vendet e Bashkimit European, një nga prioritetet e ministrisë së bujqësisë me interes për fermerët dhe ekonominë e vendit.

Ndryshimi i propozuar në pikën 3 të nenit 6, në përputhje edhe me pikën 1 të këtij neni, i japin ministrit kompetencën për të urdhëruar identifikimin e detyrueshtëm të llojeve të tjera të kafshëve për të parandaluar, zbuluar dhe kontrolluar sëmundje infektive.

- Në nenin 5 propozohen ndryshime në nenin 12 të ligjit "Identifikimi i qenve" ku nga identifikimi i "qenve" të bëhet në "kafshët e shoqërimit", kjo do të mundësojë që të përfshihen në identifikimin edhe llojet e tjera të kafshëve të shoqërimit (psh. macet, qelbësat, brejtësit lepujt, reptilët, etj.) të cilët shoqërojnë pronarët e tyre dhe mbahen në ambientet shtëpiake. Këto kafshë, bazuar e dhe në rregulloren përkatëse të miratuar në përputhje me pikën 4 të këtij neni që është përafrim i rregulloreve përkatëse të BE-së në legjislacionin Shqiptar për lëvizjen për qëllime jo tregëtare të kafshëve të shoqërimit si dhe forma e identifikimit dhe modeli i pasaportes së kafshëve të llojit qen dhe mace.
- Në nenin 6 propozohet ndryshimi në nenin 14 të ligjit "Lista e sëmundjeve" përcakton që Shërbimi veterinar kryen monitorimin e sëmundjeve që janë të listuara sipas pikës 1 të këtij neni në mënyrë që të zbulojë në kohë praninë e tyre. Shërbimi veterinar plotëson listën e sëmundjeve me sëmundje e reja që shfaqen nëpërmjet mbledhjes, ruajtjes dhe analizimit të informacionit të vlefshëm në lidhje me situatën epidemiologjike.
- Në nenin 7 propozohen ndryshime në nenin 15 të ligjit "Masat e përgjithshme profilaktike" ku krahas masave të përgjithshme profilaktike shtohen edhe masa shtesë të kontrollit të sëmundjeve të cilat merren bazuar në rrethanat epidemiologjike, llojin e fermave dhe stabilimenteve, vendndodhjet, prodhimin, llojet dhe kategoritë e kafshëve të përfshira si dhe kushtet ekonomike ose sociale. Këto masa shtesë për kontrollin e sëmundjes miratohen me urdhër Ministri.
- Në nenin 8 propozohet ndryshimi në nenin 16 të ligjit "Programet vjetore të monitorimit" ku përcaktohet që autoriteti kompetent përgatit programet vjetore të profilaksisë veterinare shtetërore, kontrollit, monitorimit dhe mbikëqyrjes së sëmundjeve me pasoja për shëndetin e kafshëve dhe shëndetin publik veterinar, mbështetur në situatën epidemiologjike në vend.
- Në nenin 9 propozohet ndryshimi në nenin 20 të ligjit "Veprimet në rastin e dyshimit" ku në pikën 3 përcaktohet që Veterineri zyrtar merr kampionet dhe i dërgon në laboratorin veterinar, të përcaktuar për sëmundjen që dyshohet dhe lajmëron në sistemin e informacionit të epidemiologjisë veterinare.
- Në nenin 10 propozohet që pas nenit 20 të ligjit shtohet neni 20/1 në të cilin përcaktohen masat paraprake profilaktike në rastin e dyshimit të një

sëmundjeje infektive. Kjo mundëson që shërbimi veterinar të ndërmarë paraprakisht, përpara konfirmimit të një sëmundjeje infektive, masa të mbështetura në ligj, për kontrollin dhe parandalimin e përhapjen e sëmundjes infektive të mundshme.

- Në nenin 11 propozohet ndryshimi në nenin 21 të ligjit “Masat me konfirmimin e sëmundjes” duke përcaktuar rregulloret përkatëse për masat që duhet të zbatohen për kontrollin dhe çrrënjosjen e sëmundjeve sipas situatës në fermën e vendosur nën mbikëqyrje zyrtare për kontrollin dhe çrrënjosjen e sëmundjeve, dhe jo një rregullore siç është aktualisht. Legjislacioni i BE, nga i cili kemi përafuar dhe vazhdojmë të përafrojmë rregulloret përkatëse për sëmundjet infektive dhe zoonotike.
- Në nenin 12 propozohet ndryshimi në nenin 30 të ligjit “Kontrollet zyrtare sanitare veterinare” pasi në nenin 129 të ligjit autoriteti kompetent ka si kompetencë mbikëqyrjen e zbatimit të ligjit dhe akteve nënligjore në zbatim të tij.
- Në nenin 13 propozohet ndryshimi i nenit 48 të ligjit “Masat e autoritetit kompetent” duke përcaktuar Ministrin si autoriteti që vendos për marrjen e masave për kontrollin dhe çrrënjosjen e sëmundjeve, në të cilat përfshihen eliminimi i kafshëve të sëmura, të dyshuara të sëmura, ose të ekspozuara kundrejt infeksionit, asgjësimin e kadavrave, produkteve të kafshëve, produkteve embrionale, të lëndëve të papërpunuara dhe të pajisjeve e mjeteve në një vatër të sëmundjes, që paraqet rrezik për shëndetin e kafshëve. Zbatimi i masave përfshin edhe kosto financiare të cilat bazuar në nenin 45 pika 3 është kompetencë e ministrit të urdhërojë përdorimin e buxhetit.
- Në nenin 14 propozohen ndryshime në nenin 51 të ligjit “Detyrat e pronarit dhe të kujdestarit” në të cilin shtohen detyrat për pronarët ose kujdestarët e kafshëve të prodhimit lidhur me masat e biosigurisë në fermë, sipas llojeve dhe kategorive të kafshëve, llojit të mbarështimit si dhe parashikohet miratimi i rregullores nga ministri për masat e biosigurisë në fermë. Biosiguria në fermë është një masë parandaluese shumë e rëndësishme dhe e detyrueshme në vendet e BE për parandalimin e futjes ose përhapjes së sëmundjeve infektive, duke bërë të mundur edhe minimizimin e dëmtimeve në kafshë dhe humbjet financiare të fermerëve dhe buxhetit të shtetit për veterinarinë.
- Në nenin 15 propozohen ndryshime në nenin 54 të ligjit “Funksionet e njësisve të qeverisjes vendore” pasi me miratimin e ligjit nr. 139/2015 “Për vetëqeverisjen vendore”, njësitë e qeverisjes vendore nuk kanë më strukturë veterinarë. përcaktohet bashkëpunimi i njësisve të qeverisjes vendore dhe shërbimit veterinar zbatimi i reformës së shërbimit veterinar dhe plotësimi i kuadrit ligjor për unifikimin e shërbimit veterinar duke mundësuar kalimin e kompetencave dhe funksioneve të shërbimit

veterinar të pushtetit lokal në strukturën e shërbimit veterinar në MBZHR. Lidhur me zbatimin e masave profilaktike, kontrollin dhe çrrënjosjen e sëmundjeve infektive në kafshë, kontrollin e qenve dhe maceve të rrugës, përcaktimin e vendgroposjes dhe eliminimin e kadavrave të kafshëve, rrethimin dhe ruajtjen e pikave të grumbullimit të mbetjeve.

- Në nenin 16 propozohet ndryshimi i pikës 3 të nenit 58 të ligjit “Gjurmueshmëria e certifikatave shëndetësore veterinare” ku përcaktohet që autoriteti kompetent mbikqyr dokumentat mjekësore veterinare për përputhjen e tyre me kërkesat e përcaktuara për procedurën e lëshimit të tyre gjë që është në përputhje me nenin 129 të ligjit në të cilin përcaktohet se autoriteti kompetent ka si kompetencë mbikqyrjen e zbatimit të ligjit dhe akteve nënligjore në zbatim të tij.
- Në nenin 17 propozohen ndryshime në nenin 61 të ligjit “Ekspozitat dhe panairët” pasi me ndryshimet e parashikuara në këtë projektligj nuk do të ketë më struktura veterinare në njësitë e qeverisjes vendore ndaj detyrimi i subjekteve organizatore të ekspozitave dhe panairëve, kur këto organizime bëhen jashtë mjediseve të stallave dhe stabilimenteve, është të njoftojnë paraprakisht me shkrim shërbimin veterinar rajonal për vendin, datën dhe orën e zhvillimit të aktivitetit si dhe miratimi ose refuzimi i kërkesës për kryerjen e këtyre veprimtarive bëhet nga Shërbimi veterinar rajonal.
- Në nenin 18 propozohet ndryshimi i pikës 3 të nenit 62 të ligjit “Detyrimet gjatë transportit” pasi me ndryshimet e parashikuara në këtë projektligj nuk do të ketë më struktura veterinare në njësitë e qeverisjes vendore ndaj përcaktohet detyrimi i Veterinerit zyrtar të urdhërojë eliminimin e detyrueshëm në vend për kafshët me dëmtime të rënda dhe njoftimi i autoritetit kompetent dhe njësive të qeverisjes vendore.
- Në nenin 19 propozohet që pas nenit 64 të ligjit shtohet neni 64/1 ku përcaktohen rregullat për lëvizjen e kafshëve të egra tokësore kur lëvizin nga një vendbanim në Shqipëri në një vendbanim tjetër në Shqipëri, ose në një shtet tjetër. Gjithashtu në këtë nen përcaktohet që kafshët e egra gjatë lëvizjes të shoqërohen me një certifikatë shëndetësore ose dokumente të tjera veterinare të përcaktuara nga Autoriteti kompetent, dhe ku certifikimi i shëndetit të kafshëve është i nevojshëm për të siguruar përputhshmërinë me kërkesat e shëndetit të kafshëve për lëvizjet e parashikuara. Përcaktim tjetër në këtë nen është dhe miratimi me urdhër të ministrit të Rregullave të hollësishme për lëvizjen e kafshëve të egra. Në ligj aktualisht nuk ka asnjë referencë ligjore për rregullat e lëvizjes së kafshëve të egra tokësore. Ndryshimet e propozuara e plotësojnë këtë vakum ligjor.

- Në nenin 20 propozohet ndryshimi i pikës 1 të nenit 87 të ligjit “Procedura për miratimin e tregtimit të PMV-ve” duke shkurtuar si afat për miratimin nga Komisioni Shtetëror i PMV-ve nga 210 ditë që ishte në 100 ditë, kjo me qëllimin që të përshpejtohen procedurat në ndihmë të subjekteve që kërkojnë të regjistrojnë dhe tregtojnë PMV në Republikën e Shqipërisë.
  - Në nenin 21 propozohen ndryshime në nenin 102 të ligjit “Sistemi i farmako-vigjilencës” duke shtuar në kuadër të farmako-vigjilencës kriteret në përdorimin e PMV-ve në kafshë për parandalimin dhe kontrollin e sëmundjeve, bazuar në karakteristikat, profilin, përhapjen e sëmundjes, disponueshmërinë dhe efikasitetin e PMV-ve dhe rreziqet e pasojat ekonomike nga sëmundjet. Gjithashtu në këtë nen përcaktohet se rregullat për përdorimin e këtyre PMV-ve miratohen me urdhër të ministrit si dhe që Autoriteti kompetent merr masat e duhura për të mbrojtur shëndetin e kafshëve dhe shëndetin publik në lidhje me përdorimin e PMV-ve për studime shkencore ose për qëllime të zhvillimit dhe testimit të tyre në kushte të kontrolluara.
  - Në nenin 22 propozohet ndryshimi i nenit 114 të ligjit “Klinika dhe spitali veterinar” duke shuar një pikë ku përcaktohet kompetenca e ministrit për të miratuar rregulloren për funksionimin e Klinikave dhe Spitaleve veterinare. Aktualisht nuk ka një rregullore për funksionimin e tyre pasi mungonte baza ligjore për miratimin e saj.
  - Në nenin 23 propozohet riformulimi i nenit 116 të ligjit “Veprimtaritë e deleguara të klinikës veterinare” për dy arsye:
    1. Veprimtaritë veterinare të kryera nga klinika veterinare për identifikimin (matrikullimin) dhe regjistrimin e fermave që nga Janari i vitit 2017 kryhen me koston e fermerëve/pronarëve të kafshëve të gjalla ndaj ato mund të kryhen nga klinika veterinare me anë të një kontrate me shërbimin veterinar rajonal pa iu nënshtruar dispozitave ligjore dhe procedurave të prokurimit publik.
    2. Fondet e akorduara nga buxheti i shtetit për kryerjen e veprimtarive të tjera veterinare (psh. vaksinime, gjurmime të sëmundjeve), janë shërbime që ofrohen nga klinikat veterinare të cilat duke qënë fonde publike i nënshtrohen detyrimisht ligjit Nr. 9643, datë 20.11.2006 “Për Prokurimin Publik”, i ndryshuar pasi nuk bën pjesë në rastet e parashikuara në nenet 5, 6, 7, 8 e 9 apo shërbimet e parashikuara në nenet 58/3, 58/4, 58/5, 58/6, 58/7 të këtij ligji për përjashtimin nga procedurat e prokurimit publik.
- Në këtë nen gjithashtu është përcaktuar që në rastin kur gjatë kryerjes së veprimtarive veterinare, klinika nuk përmbush kushtet e kontratës, sipas parashikimeve të saj, shërbimit veterinar rajonal i lind e drejta e për

*Lidhja me Blouin e Puff. Vendedor*

*Costo Prokurimet nga fermeret*

zgjidhjen e njëanshme të kontratës para përfundimit të afatit të përcaktuar në të, penaltete e dëmshpërblim.

- Në nenin 24 propozohet shfuqizimi i nenit 117 i ligjit “Kontrata për delegimin e veprimtarive” për arsye se përcaktimet në këtë nen janë parashikuar në ndryshimet e nenit 116.
- Në nenin 25 propozohet ndryshimi i pikës 1 të nenit 114 të ligjit “Laboratorët shtetërorë veterinarë” duke kaluar varësia e laboratorëve shtetërorë veterinarë, konkretisht të pesë laboratorëve rajonal të shëndetit të kafshëve që aktualisht janë nën varësinë e Autoritetit Kombëtar të Ushqimit (AKU), nën Institutin e Sigurisë Ushqimore dhe Veterinarisë (ISUV) në një rrjet laboratorik. Unifikimi i këtyre laboratorëve në një rrjet nën varësinë e ISUV si Qendër Kombëtare e Referencës Laboratorike Veterinare do të përmirësojë performancën dhe cilësinë e tyre duke bërë në mënyrë të drejtpërdrejt drejtimin metodologjik të laboratorëve, kontrollin e skemave që garantojnë cilësinë e provave, zbatimin dhe përmbushjen e kushteve të përcaktuara në praktikën e mira laboratorike si dhe kualifikimin e specialistëve dhe të teknikëve të laboratorëve veterinarë.
- Në nenin 26 propozohen shtimi i pikës 4 në nenin 122 të ligjit “Veprimtaria e laboratorëve veterinarë” në të cilën përcaktohen dispozitat për masat në lidhje me biosigurinë dhe të izolimit biologjik nga laboratorët që përdorin agjentë patogjenë me qëllim kërkimin shkencor, edukimin, diagnostikimin ose prodhimin e vaksinave ose produkteve të tjera biologjike. Këto masa vendosen me qëllim administrimin korrekt për ndalimin e përhapjes së agjentëve patogjenë në kafshë të gjalla dhe mjedis.
- Në nenin 27 propozohen ndryshime në nenin 128 të ligjit “Përbërja e shërbimit veterinar” nëpërmjet të cilave përcaktohet se shërbimi veterinar rajonal përbëhet nga veterinerët zyrtarë në strukturat dhe territorin përkatës që ato mbulojnë si dhe shfuqizimi i pikës 4 për strukturat veterinarë në njësitë e qeverisjes vendore dhe veprimtaritë që mbulojnë ato.
- Në nenin 28 propozohen shtimi i gërmës j në nenin 129 të ligjit “Kompetencat e autoritetit kompetent” në të cilën përcaktohet shërbimin veterinar me qëllim ndihmën për të siguruar zbatimin e këtij ligji mund të lidhë marrëveshje bashkëpunimi me Policinë e Shtetit.
- Në nenin 29 propozohen ndryshime në nenin 130 të ligjit “Fusha e veprimtarisë së veterinerit zyrtar” të cilat plotësojnë fushën e veprimtarisë së veterinerit zyrtar duke shtuar edhe funksionet që aktualisht bazuar në nenin 54 i kanë strukturat veterinarë të qeverisjes vendore. në këtë nen



shtohet edhe pika që përcakton miratimin nga ministri të formateve të listave të kontrollit.

- Në nenin 30 propozohen ndryshime në nenin 131 të ligjit “Veterineri zyrtar” të cilat plotësojnë funksionet e veterinerit zyrtar për kontrollet në thertore, tregjet e kafshëve të gjalla dhe kullota, njësitë e shitjes së kafshëve të shoqërimit dhe mbledhjen, grumbullimin dhe groposjen e kadavrave të kafshëve, funksione këto të cilat aktualisht, bazuar në nenin 54, i kanë strukturat veterinarë të qeverisjes vendore.
- Në nenin 31 propozohet që pas nenit 131 të ligjit të shtohet neni 131/1 përcaktohet që mjeku veteriner i autorizuar mund të ushtrojë funksionet e veterinerit zyrtar pas pajisjes së tij me autorizim nga autoriteti kompetent. Kjo është e përmëndur në pikën 60 të nenit 4 “Përkufizimet” por nuk kishte një dispozitë të përcaktuar ligjore në të cilën të mbështetet autorizimi i tij nga autoriteti kompetent për ushtrimin e funksioneve të veterinerit zyrtar.
- Në nenin 32 propozohen shtimi i nënndarjes vi në nenin 134 të ligjit “Kundërvajtjet administrative” ku përcaktohen masat për kundërvajtjet administrative, kur veprohet në kundërshtim në lidhje me masat e përgjithshme profilaktike dhe prodhimin e PMV-ve në vend, kundravajtje të cilat nuk janë të përcaktuara më parë në këtë nen.
- Në nenin 33 propozohet ndryshimi i nenit 137 të ligjit “Licencimi i veprimtarive” i cili përcakton që licencimi, anulimi ose shfuqizimi i licencës për veprimtaritë e kryera për qëllime të natyrës ekonomike, tregtare, profesionale dhe çdo natyre tjetër të ngjashme, përveç atyre të natyrës vetjake, që parashikohen në këtë ligj do të kryhen sipas kategorive e nënkategorive respektive të fushës II të shtojcës së ligjit nr. 10081, datë 23.2.2009 “Për licencat, autorizimet dhe lejet në Republikën e Shqipërisë”, i ndryshuar. Gjithashtu në pikën 2 të këtij neni përcaktohet se veterineri zyrtar përveç ndëshkimit për shkeljet e konstatuara dhe kur vëren se masat korrigjuese nuk janë zbatuar brenda afatit i dërgon menjëherë autoritetit kompetent procesverbalin e inspektimit dhe propozimin për anulimin ose shfuqizimin e licencës së aktivitetit të subjektit. Autoriteti kompetent brenda 30 ditëve nga data e njoftimit të procesverbalit të subjektit të inspektimit merr vendimin për anulimin ose shfuqizimin e licencës së aktivitetit.
- Në nenin 34 përcaktohet hyrja në fuqi e ligjit.

## **VII. INSTITUCIONET DHE ORGANET QË NGARKOHEN PËR ZBATIMIN E AKTIT**

Ministria e Bujqësisë dhe Zhvillimit Rural.

VIII. PERSONAT DHE INSTITUCIONET QË KANË KONTRIBUAR  
NË HARTIMIN E PROJEKTAKTIT

Ministria e Bujqësisë dhe Zhvillimit Rural si ministria përgjegjëse për shërbimin veterinar, ka përgatitur këtë projektligj.

IX. RAPORTI I VLERËSIMIT TË TË ARDHURAVE DHE  
SHPENZIMEVE BUXHETORE

Miratimi i ndryshimeve ligjore të sipërpërmëdura nuk ka kosto financiare shtesë.

  
MINISTRI  
NIKO PELESHI